

陶雲汀先生奏疏

奏摺卷十目錄

撫皖稿

安化陶澍

查辦盱眙天長被水情形請給口糧摺子

奏報琉球國使臣改道過境日期摺子

御賜福字鹿肉鹿腿謝

恩摺子

皖省各屬居民及附住棚民分別編查保甲摺子

恭報交卸撫篆入

覲摺子

恭報回任接印日期摺子

查勘淮河情形設法籌辦摺子

附片二件

創修安徽省志摺子

附奏委弁彈壓採運石工夫役摺片

附奏勸修水利摺片

知州實力辦公請加陞銜獎勵摺子

附奏拏獲結盟匪犯多名移交新撫審辦摺子

調補江蘇巡撫謝

恩摺子

御賜藥錠謝

恩摺子

籌款飭繳兇器摺子

附奏裁汰里書摺片

勸設豐備義倉摺子

附片一件

查辦盱眙天長被水情形請給口糧摺子

奏爲查明盱眙天長二縣被水情形及天長縣災民應需接濟恭摺籲懇

天恩緩徵錢糧並請

賞給口糧仰祈

聖鑒事竊照南河堰盱隄工猝被風暴掣刷安徽省盱眙天長境內間有被淹飭委查勘情形經臣恭摺具

奏並將天長縣有無應需接濟之處統俟委員等確勘再行辦理緣由奏

聞在案茲據廬鳳道戴聰泗州知州豐紳圖督同委員及盱眙縣知縣周士鉦勘明縣境人民田廬均無損傷其下江被災男婦均在山陽縣所轄之周橋息浪庵迤南地方搭棚棲止與盱眙之蔣家壩一帶接壤先經該縣周士鉦不分畛域會同山陽縣放散饘餅復經江蘇省委員帶銀在彼撫卹現無災黎奔避盱境惟天長縣地勢較低因高郵湖水漫入境內以致耿家尖等八鎮積水汪洋多遭漂淌被災較重寶家河等十五鎮水深一二尺不等被災次重經該縣陶登

瀛分途搭蓋蓆棚散給餅餌餬口有資今冬尙可支持惟來年麥收失望困苦情形應需接濟稟請於來春。

賞給口糧一月等情由藩司徐承恩核明詳請具

奏前來臣覆加體察係屬實在情形仰懇

聖主格外恩施俯將天長縣被水之耿家尖等八鎮寶家河等十五鎮災民於來春

賞給一月口糧以資接濟屯坐泗州衛饑軍一律辦理所需口糧照例在於司庫正項銀內折色支給搭棚餅餌等項亦於正項銀內支放應用查

災及辦理撫卹口糧公費銀兩循例於耗羨項
下動用事竣核實報銷坍塌房間俟水退時驗
明基址照例辦理至天長縣應徵道光五年上
忙新賦及道光四年併帶徵道光三年民欠民
衛錢糧津租等銀均請緩至道光五年秋後啓
徵以紓民力又泗州衛屯坐高郵寶應被水災
軍應隨同下江情形一律辦理所有查明盱眙
天長二縣被水情形分別辦理緣由謹會同大
學士兩江總督臣孫玉庭恭摺具

奏伏乞

皇上聖鑒

訓示施行謹

奏

道光四年十二月十八日具

奏五年正月二十五日奉到

硃批另有旨欽此同日奉到道光五年正月初七日

內閣奉

上諭陶澍奏查明盱眙天長二縣被水情形請分別
施恩一摺安徽省盱眙天長等縣境接近高堰因
隄工場卸猝被水淹據該撫查明盱眙縣境人民

田廬均無損傷惟天長縣地勢低窪被災較重懇請撫卹著加恩將天長縣被水之耿家尖等八鎮竇家河等十五鎮災民於今春賞給一月口糧屯坐泗州衛饑軍一律辦理所需口糧照例於司庫正項銀內折色支給其搭棚饘餅等項亦於正項銀內支放應用查災及辦理撫卹口糧公費銀兩照例於耗羨項下動用事竣核實報銷坍塌房間俟水退時驗明辦理至天長縣應徵道光五年上忙新賦及道光四年併帶徵道光三年民欠民衛錢糧津租等銀均著緩至道光五年秋後啓徵以

紓民力泗州衛屯坐高郵寶應被水災軍並著隨
同下江情形一律辦理該部知道欽此

奏報琉球國使臣改道過境日期摺子

奏爲恭報琉球國使臣改道進京委員護送過境

日期仰祈

聖鑒事竊准江蘇撫

臣

張師誠咨會琉球國遣使入

貢行抵丹徒縣境因高堰隄工被風掣卸湖水下

注水湧溜急十分危險運河絳道多被淹沒水

陸均難行走卽在丹徒起旱改道由安徽之滁

州鳳陽等屬前進等因當經檄行藩臬兩司轉

飭沿途道府州督飭各州縣預備照料並委候

補通判朱註浦口營都司慶福等接護去後茲

據陸續具報琉球國使臣於本年十一月三十日入安徽首站滁州境內該文武委員接護前進逐程護送十二月初六日出宿州境交替江蘇銅山縣接護前進沿途經過州縣照例應付並無延誤該使臣行走亦甚安靜除移咨山東直隸一體照料前進如期到京外所有琉球國使臣過境日期理合恭摺奏

聞伏乞

皇上聖鑒謹

奏

道光四年十二月十八日具

奏五年正月二十五日奉到

硃批知道了欽此

御賜福字麕肉鹿腿謝

恩摺子

奏爲恭謝

天恩事頃臣摺并回皖齋奉

頒賞臣

御書福字一幅麕肉鹿腿等件謹卽出郊跪迎至署
望

闕叩頭謝

恩祇領欽惟我

皇上錫羨延釐

膺禋布闔疇開五福平康胥近乎

龍光

天保九如醵穀式符乎鹿雅九有罔

均禧之化

軒管頒春百僚飫

推食之

恩

堯廚飽德

臣

珍承

嘉貺渥荷

隆施幸豈樂之攸宜令德惟廣燕譽沐

寵榮之迭被素餐倍凜狙懸

錫本同民喜共子黎而拜

賜膏先正席爰偕寅采以分甘欣瞻

御墨高懸鳳翥仰

鴻題之煥計日

宸階展

覲鸞鏘隨豹尾之班所有

臣

感忭下忱謹繕摺恭謝

天恩伏乞

皇上聖鑒謹

奏

附錄卷之五 道光四年十二月十八日具

奏五年正月二十五日奉到

硃批知道了欽此

皖省各屬居民及附住棚民分別編查保甲摺
子

奏爲皖省各屬居民及附住棚民分別編查保甲
仰祈

聖鑒事嘉慶二十年正月欽奉

上諭那彥成奏酌定覆查保甲章程一摺所奏每年秋
收無事後外出耕作及各項傭工人衆歸里之時再
行稽核一次免致匪徒濶跡所奏甚爲核實著各直
省通行照辦督撫於歲底彙奏一次等因欽此又於
道光四年五月欽奉

上諭著各該督撫等嚴飭該府州縣將棚民逐細查
察按十戶設立甲長每年遞換門牌隨時抽驗禁
止匪類潛匿勾串滋事如查有不安本分鬪狠健
訟之徒立即嚴拏示懲務當實力奉行不可視爲
具文等因欽此遵查安徽一省濱帶江湖縈連淮
泗省北各屬接壤徐豫地偏人悍匪徒出沒其
間夙稱難治省南一帶居民較爲團聚守望易
於聯絡而深崖幽谷亦頗藏奸稽查均應嚴密
至棚民一項則徽州寧國池州廣德四府州往
往有之緣該境山嶺較多外來民人搭棚棲止

租種山地雖係貧民謀食之常與川陝等省山
佃情形無異但人數既多卽良莠不齊難保不
滋生事端是以向同土著民人一體編入保甲
俾資查考本年欽奉

諭旨飭查當經督

臣及臣

先後將查辦緣由恭摺具

奏並飭藩臬兩司於秋後委員會同各該州縣逐
一編查去後茲據藩司徐承恩臬司劉斯崑詳
據各州縣於秋收後遵照章程將各屬編造門
牌冊籍情形稟報並經道府直隸州覆稱就近
挨查無異其棚民一項飭委候補知府劉湜前

往查辦據稱會同各州縣親履山場按戶編排
查明一處卽就中選擇誠實棚民作爲棚頭通
計徽州府屬之歙縣共有棚民一百五十六戶
選充棚頭十七名休寧縣共有棚民二百三十
一戶選充棚頭十三名祁門縣共有棚民四百
三十二戶選充棚頭二十四名黟縣僅有棚民
十戶選充棚頭一名績溪縣共有棚民十二戶
俱散住各保不便編設棚頭仍令各地保兼管
寧國府屬之寧國縣共有棚民四百九十一戶
選充棚民二十三名池州府屬之銅陵縣共有

棚民十八戶選充棚頭二名建德縣共有棚民一百二十二戶選充棚頭十二名廣德州共有棚民一千二百七十九戶選充棚頭四十四名其保內僅有棚民數戶者仍令鄉保兼管均已繕造門牌底冊分別懸掛存案飭令所選棚頭時加查察現在各處棚民均屬安靜等情由該司等逐加查核詳請具

奏前來

臣

查編查保甲爲除莠安良要法必須辦理認真庶使匪類胥除閭閻安輯其棚民一項經此次編查之後卽以現造戶口冊籍立案毋

許任意增添各業主亦不得再行私租以致日
益加多莫可究詰遇有遷移隨時更換申嚴約
束實力奉行並不准書役藉端擾累以仰副

聖主除暴安良之至意所有道光四年各屬居民及
附住棚民分別編查保甲緣由謹會同大學士

兩江總督

臣

孫玉庭合詞具

奏伏乞

皇上聖鑒謹

奏

道光四年十二月十八日具

奏五年正月二十五日奉到

硃批知道了欽此

恭報交卸撫篆入

覲摺子

奏爲恭報交卸撫篆併起程日期仰祈

聖鑒事竊

臣

於本年十一月初五日將封印後入

覲緣由先期奏

聞奉到

硃批知道了欽此聞

命之下欽感難名現屆封印所有一切年例

題奏事件均已次第辦竣於十二月二十日將安

徽巡撫印務交藩司徐承恩暫行護理其藩司

印務飭令臬司劉斯媚兼署臣卽於二十一日

由皖起程北上叩覲

天顏跪聆

恩訓除恭疏

題報外所有臣交卸撫篆及起程日期理合恭摺
奏

聞伏乞

皇上聖鑒謹

奏

道光四年十二月二十日具

奏五年正月二十五日奉到

硃批知道了欽此

恭報回任接印日期摺子

奏爲恭報微

臣

回任接印日期叩謝

天恩仰祈

聖鑒事竊

臣

前奉

硃批准令

陛見遵於封篆後北上本年正月十九日趨詣

闕廷恭覲

天顏

召見四次

訓勉有加欽感微衷莫名依戀比蒙

恩命回任於二月二十四日行抵安徽省城准護理

撫篆布政使

臣

徐承恩委安慶府知府汪恩撫

標遊擊趙承德齎送巡撫兼提督關防一顆蕪

湖關關防一顆暨

王命旗牌桿文卷等項前來

臣

恭設香案謝

恩祇領訖伏念

臣

以川東道員荷

皇上特達之知甫一載間由臬司擢授藩司旋蒙

簡畀封疆重任受事以來始則辦理清查剔釐數十

既知之不可一日釋

年之糾轉繼因沿江被水流離載道專意拊循

諸懷也勉之又勉以

勉竭庸愚兢兢補救於一切吏治民風尙未能

副委任

極意整頓茲承

溫諭回蒞皖疆倚裳稚齒欣載

德以南來鏤版

臣心益瞻

天而北企惟有凜遵

聖訓彌矢精誠期駕策之毋忘冀

鴻慈之稍答所有

微臣

感激下忱理合繕摺恭謝

天恩再

臣

經由直隸山東地方民氣收恬自入安徽

省界雨澤較多菜麥俱已茁秀近省一帶尤極

青葱茂豫糧價中平人情歡悅足慰

宸廑合併附陳伏乞

皇上聖鑒謹

奏

道光五年二月二十七日具

奏四月初二日奉到

硃批所奏俱悉欽此

查勘淮河情形設法籌辦摺子

附片二件

奏爲履勘淮河併設法籌辦情形仰祈

聖鑒事竊

臣

前月入覲

天顏仰蒙

垂詢淮河淺阻情形並

諭回皖時順道查勘等因

臣於

陛辭後馳抵鳳陽府境遇廬鳳道戴聰詢悉前此洪

湖直瀉淮流逐段淺阻窒礙漕行業於正月內

率同鳳陽府程懷璟及各州縣設法疏濬並經

大學士

臣

孫玉庭札飭疏濬沿淮各湖茲

臣帶

同該道親往勘得淮河正身現已流通船行無
滯惟洪澤一湖必藉淮源旺盛方資收蓄敵黃
自應多方導引以助其勢遍歷濱淮各處有鳳
陽縣境之花源湖壽州境之城西湖鳳臺縣境
之蕉岡湖均可抽溝引導入淮此三湖皆周圍
數十里本係民田久淹成浸其城西湖焦岡湖
兩處抽溝約需經費數千兩現經該州縣勸民
辦理毋庸另籌經費惟鳳陽縣境之花源湖該
境民多窮乏勢難捐辦查得道庫有舊存水利
平餘銀兩係不報撥之閒款堪以動用擬提用

銀二千兩交鳳陽縣剋期興辦又懷遠縣荆山口之南因嘉慶年間黃河南潰新漲沙洲名曰葫蘆繫東西橫長十餘里阻遏茨河水自西南而北繞越此洲倍形迂曲以致水勢倒漾爲上游各州縣之患前經抽溝一道必須再開引河數道將葫蘆繫鑿斷俾茨河口門通暢而淮水亦得建瓴直下所需工費查司庫有積存宿靈抽溝利息銀兩擬提用銀一千二百兩交懷遠縣趕緊疏挑以上花源湖葫蘆繫兩處動用工費無多均非正項錢糧應俟事竣由道驗收

毋庸造冊報銷以歸簡捷所有查勘淮河情形
並酌籌辦理緣由理合恭摺覆

奏伏乞

皇上聖鑒訓示施行謹

奏

道光五年二月二十七日具

奏四月初二日奉到

硃批所辦甚好務要認真查驗另有旨諭欽此同日
奉到

上諭陶澍奏籌辦淮河情形一摺洪澤湖藉淮敵黃

自應多方導引以資收蓄經該撫勘明各處情形
除壽州境城西湖鳳臺縣境焦岡湖兩處抽溝係
該民人自辦毋庸另籌經費外惟鳳陽縣境花源
湖民多窮乏勢難捐辦著准其將道庫舊存水利
平餘閒款內提銀二千兩交鳳陽縣剋期興辦又
懷遠縣荆山口南新漲沙洲葫蘆繫須再開引河
數道著准其在司庫積存宿靈抽溝利息內提銀
一千二百兩交懷遠縣趕緊疏挑該兩處動用工
費均非正項錢糧工竣由道驗收毋庸造冊報銷
該撫務須認真查驗如有草率偷減卽行叅辦毋

附錄卷之二
稍徇隱該部知道欽此

再臣查淮水爲洪澤湖之源出自豫省桐柏縣
流經固始入安徽阜陽境至霍邱縣之溜子口
而南納淠水至潁上縣之八里垛而北納潁水
地勢建瓴尙無阻滯迨壽州之正陽關以逮懷
遠至鳳陽之蚌埠一帶河流曲折時東時北以
次納東淝西淝裔溝黑濠洛碭及汴河茨河天
河渦河北淝河大小數十水兼之西有鳳臺之
峽石山東有懷遠之荆塗山重重鈐柙淮流其
間水勢本屬紆回自嘉慶年間黃河南潰夾帶
泥沙淮流淤墊成高以致左右收納各水不能

暢入節節壅滯迴漾成湖不一而足臣此次履
勘親登塗山絕頂復登壽州城北之八公山數
百里長河支汊瞭然在目此時春水方生勢已
瀰漫一交伏汎每汪洋一片橫溢民田歲歲偏
災耗費

帑項自應設法補救以奠災區惟查洪澤一湖近
年因啓放黃流其西岸已多淤灘若將淮水疏
刷不特水深泥滑之處難以興工兼恐沙泥直
下更益洪湖之患祇有築隄束水俾清流畅入
湖心既可蓄以敵黃而於兩岸民田卽可藉隄

保衛但經費浩大無從籌措必須地方官實心實力爲民信服者隨時督勸百姓設法辦理日計不足月計有餘自可漸著成效查現在各州縣中已有數處勸民修利隄防開通溝洫俟辦竣核實奏請

恩獎以資鼓勵此外如壽州之芍陂懷遠之郭陂塘等處皆水利最鉅之區日久蕪廢容臣督率各屬次第整理以興民利合併附陳伏乞

訓示謹

奏

道光五年二月二十七日附

奏四月初二日奉到

殊批興水利除水患莫大之善政也總要督率認真
勸導有方固不可徒費周章亦不可始勤終怠詳
慎勉之欽此

再淮河水勢業已流通春水方生宿州頭二兩幫漕船由淮達湖可無阻滯惟現在借黃濟運洪湖束清壩口門早經堵築須俟啓壩之後始能出口至鳳陽關稅先因淮河淺涸貨舟不通頓形缺短茲據管關道戴聰稟稱入春以來疏挖各處淤淺船行漸順趕緊補苴缺額尙屬無多除俟該關截數開報再行核辦外謹附片以

聞謹

奏

道光五年二月二十七日附

奏四月初二日奉到

硃批知道了欽此

創修安徽省志摺子

奏爲創修省志仰祈

聖鑒事竊查江南通志自雍正七年欽奉

諭旨修輯其時安徽藩司駐劄江寧尙未分移安慶一

切文獻每多簡畧前因纂輯

大清一統志經國史館催取志書各州縣無所承

藉造送稽遲迄今數年之久仍未能詳備臣思

致治固宜於因地設教尤重於觀民古者小史

掌邦國之志外史掌四方之志而土訓誦訓皆

得以地圖地事地俗入告以施其政誠以一方

之掌故卽一方之人心風俗所係經緯布置藉
資考鏡固非徒以備冊府之守已也我

國家承平數百載

列聖累洽重熙休養生息安徽夙稱文物之區涵濡

德化不特名臣循吏儒林文苑志行多有其人卽巖鄉僻

壤孝子順孫貞女節婦例邀

旌典者亦復比比皆是顧聽其歲久湮沒非所以廣
聖化而昭來許也

臣

與藩臬兩司公餘籌議以爲安

微自分省以來未有志書卽上下江合修之志
於乾隆元年告成迄今已閱九十載愈久則事

愈積而搜訪愈難若田賦水利學校兵制等項
尤關重大未可聽其散佚爰卽酌定章程督飭
道府州縣博加採訪妥籌經費於省城設局纂
修勒限一年蒞事務俾吏治民風士習咸歸蒼
萃用備

國家典章之採除俟書成恭

進外所有設局創修省志緣由謹繕摺具

奏伏乞

皇上聖鑒訓示謹

奏

道光五年四月十三日具

奏五月十三日奉到

硃批另有旨欽此同日奉到道光五年四月二十八日內閣奉

上諭陶澍奏創修省志一摺江南通志成於乾隆元年安徽自分省以來未輯通志於掌故難免闕漏茲據該撫奏明在省城設局纂修著卽酌定章程督飭所屬博加採訪毋濫毋遺並著予限一年纂輯成書以重文獻而資考鏡欽此

附奏委弁彈壓採運石工夫役摺片

再本年漕艘欽奉

諭旨趕緊前進經臣迭飭嚴催現在江西湖廣幫船

均已掃數出安徽境並無逗留其舵工水手等項人役亦均彈壓安靜惟查本年南河隄工石料均在盱眙縣之河稍橋仇家集打石山等處採辦運送石匠夫役及貿易人等不下萬餘良窳雜聚誠恐滋生事端該處距省千里鞭長莫及卽該縣亦難以分身照料臣已遴委泗州營候補千總羅旭東帶兵十名就近前往梭織巡

陞學 卷一
三
查彈壓仍於 臣衙門劃存緝捕公費內提銀二百兩給作工食俾不致枵腹從事稽查可期得力合併附片具陳仰慰

宸厪謹

奏

道光五年四月十三日拜發五月十三日奉到硃批知道了欽此

附奏勸修水利摺片

再臣前奏勘辦淮河情形一摺接奉

硃批興水利除水患莫大之善政也總要督率認真
勸導有方固不可徒費周章亦不可始勤終怠詳
慎勉之欽此捧誦之下仰見我

皇上勤求民莫

訓示周詳之至意曷勝感悚欽佩伏查皖省南介大
江北近黃河西引長淮東瀦洪澤低窪之區最
易受淹臣前因查辦水災節飭各州縣設法修
利隄防藉資捍衛其時沿江各圩垸不下數百

所咸卽勸民興築宣城南陵繁昌等縣被沖尤多如金寶圩周圍至一百七十餘里如養賢圩葉村灣管嘴灘等處缺口各長五六百丈高至二三丈不等經臣督飭該府郭承恩高澤履該縣朱錦琮劉邦鼎張星煥等勸諭捐修均已次第竣工其銅陵縣之邊江老壩綿長六十餘里共需土方一萬七千有餘亦經督飭該縣孫榮勸令紳士等計畝攤修現在又據望江縣尹作翰稟報該縣之妙光圖等圩周圍三十餘里內有田三萬七千餘畝一經夏漲卽虞淹沒該縣

接到通飭卽勸令紳民計畝出夫通力合作以
種田之多寡定築隄之丈尺間有田多而人力
未逮卽於田少人多之戶捐償銀錢令其幫同
挑築俾田多者不致偷安取巧田少者亦無舍
己芸人之病興工兩月一例報竣統計隄長三
千三百餘丈高廣各二丈五尺驗收之後經臣
飭司記功併飭將紳士等給匾獎勵其鳳陽花
源湖現已興挑復查得花源湖之北有牟家湖
一處亦可引水入淮自黃水停淤每逢盛漲水
無宣洩田多漫淹飭據署鳳陽縣候補通判洪

大鋪稟勘湖長二十餘里西有舊溝一道直抵
淮河長五百八十餘丈應行挑濬有該境耆民
陳姓刁姓牟姓等僉請照業食佃力之法捐資
集夫挑辦如捐款不敷該通判自願捐廉資助
臣已批飭如稟辦理其餘各處容臣逐漸督率
興修斷不敢徒爲周章亦不敢稍有怠弛以副
宸厪所有現在勸修水利各情形合併附片以
聞謹

奏

道光五年四月十三日具

奏五月十三日奉到

硃批知道了欽此

知州實力辦公請加陞銜獎勵摺子

奏爲知州實力辦公著有成效請

旨賞加陞銜以重地方仰祈

聖鑒事竊照鳳陽府屬之宿州地方離省最遠爲入境首站與江蘇之銅睢蕭碭河南之永城等處犬牙相錯向爲匪徒出沒之所兼以幅輳遼闊民風曠悍動輒爭鬪每年命案不下百數十起夙稱難治茲查該州知州蘇元璐係山西舉人道光二年冬由銅陵縣知縣陞補今職該員自抵任以來將及三載於地方一切頗能整頓選

置約長勸民息訟除莠安良匪棍多經就獲兇
暴之徒均知斂迹命案漸少又因民間知書者
少勸設義學二百餘所延師教授貧民子弟得
以入塾讀書臣於今年正月入

覲經由該境見其誦讀相聞沿途長幼漸知禮節察
看輿情咸形愛戴又該州爲九省通衢減黃灌
注行路維艱該牧勸民修理二百里驛道一律
坦平並未絲毫請動公項並勸民開濬溝渠俾
資蓄洩行旅農田均稱便益據廬鳳道戴聰鳳
陽府程懷璟詳請鼓勵並據兩司會詳前來臣

查宿州知州蘇元璐辦事實心勤求治理輿情
相安實屬地方得力之員合無仰懇

皇上逾格

鴻施賞加同知直隸州陞銜仍暫留宿州之任在該
牧感激

特恩自更始終勤奮而於衝途疲曠之區可收得人

之效

臣

爲地方起見謹會同兩江總督

臣

魏元

煜恭摺具

奏伏乞

皇上訓示謹

奏

道光五年五月二十九日具

奏七月初五日奉到

硃批另有旨欽此同日奉到道光五年六月二十日

內閣奉

上諭陶澍奏知州實力辦公著有成效請加陞銜一摺安徽宿州知州蘇元璐自抵任以來選置約長勸民息訟緝拏匪棍兇暴斂跡又復勸設義學修理驛道開濬溝渠在在均有成效洵爲地方得力之員著加恩賞加同知銜仍留宿州之任以示獎

勵該部知道欽此

附奏拏獲結盟匪犯多名移交新撫審辦摺片
再鳳潁一帶與徐豫毘連向爲匪徒出沒之所
經臣節次飭拏獲有兇盜匪棍百數十名嚴行
懲辦地方稍資安戢誠恐各牧令始勤終怠復
飭隨時訪查勿稍鬆勁茲據宿州知州蘇元璐
具稟訪得巨匪管希文等有異姓結盟聚匪滋
害之事當卽會營先獲韓起分王合僧原青三
名究出管希文起意結拜弟兄首從共三十餘
人飭差嚴拘又獲高得芳高得茂二名被管希
文帶領多人在途刦去等情臣查管希文前曾

共毆梁得金身死並糾同賈孟西等二十二人
結拜弟兄犯案從重擬流恭逢

恩詔免罪今復結盟奪犯實屬怙惡兇橫其聽糾黨
夥亦均係匪徒必須嚴拏懲治以絕根株當飭
各屬文武會同堵緝卽據亳州知州任壽世密
偵得首犯管希文在雉河集藏匿星夜馳往率
同巡檢余桂森候補府經歷陸燿如外委郝凌
雲等各帶兵役四面圍拏該犯管希文膽敢率
夥執持刀械拒捕被兵役打倒捆住併獲夥犯
姚進禮黃金梅陳幅謝宜鄭炳雪等五名復協

同河南永城縣四面掩捕又獲夥犯李合正劉
希珠江有富高得強高福齊高得芳申尙有王
應沅朱炳照朱彩彰孫宏進朱鳳淋賀立本劉
思樹李二呼山宋傳經陳懷璧高得茂英九思
胡心朋等二十名就近交永城縣研訊並據該
州蘇元璐拏獲董思渠江有序張悅秦棕堯陳
連董廷桂相景度謝光得張禿匠董玉琢等十
名又據潁上縣知縣劉耀椿拏獲丁四歪孜楊
二泮等二名隔別研究俱供結盟奪犯係管希
文造意爲首惟同夥人數間有參差並究出僧

原青尙有搶佔婦女情事先後錄供稟報前來
臣查管希文等甫經聚衆結盟卽經該州等訪
聞拘獲首從四十餘名緝捕尙屬認真此等匪
徒愍不畏法必須提省嚴究盡法處治以除地
方之害當卽飛提並咨會河南撫臣飭緝各犯
來皖歸案審辦現據陸續解犯到省尙未齊全
正在提審間臣奉

諭旨調任江蘇巡撫卽行起程除移交新任安徽撫
臣張師誠催提未到各犯一併嚴審究辦外合
將拏獲結盟匪犯情形附片奏

聞伏乞

聖鑒謹

奏

道光五年五月二十九日附

奏七月初五日奉到

硃批查拏甚好知道了欽此

調補江蘇巡撫謝

恩摺子

奏爲恭謝

天恩事竊臣接准部咨道光五年五月十八日內閣奉

上諭張師誠著調補安徽巡撫陶澍著調補江蘇巡撫該撫等俱各帶印起程於途次交代卽赴新任毋庸來京請訓欽此當卽恭設香案望

闕叩頭謝

恩伏思

臣蒙

皇上特達之知

簡畀封疆重任勉竭庸愚涓埃莫効本年正月內趨
詣

闕廷仰蒙

訓勉有加莫名欽感茲復渥荷

恩綸調補江蘇巡撫聞

命自

天感悚無地查蘇省爲江河要區政務殷繁財賦甲

於他省目下議籌海運及漕米事宜尤關緊要

責任綦重報稱尤難

臣

現將經手事件趕辦完

竣卽遵

旨帶印起程於途次迎交調任撫臣張師誠接收臣
卽由彼迅速赴任所有感激下忱理合恭摺

奏謝

天恩伏祈

皇上聖鑒謹

奏

道光五年五月二十九日具

奏七月初六日奉到

硃批勉力爲之以副委任欽此

御賜藥錠謝

恩摺子

奏爲恭謝

天恩事頃

臣

齋摺差弁回院奉到

御賜藥錠一匣謹卽恭設香案望

闕叩頭祇領伏念

臣

質愧苓黃心輸葵赤際此蓄

蘭之令序欣承保艾之

隆施九穗麥而六穗禾

福疇告慶五日風而十日雨

壽寓延釐

醲膏已遍乎寰區

珍劑更承夫

渥眎迎風解愠金泥纏五色之絲啓篋懷馨丹粒襲
三霄之露謹分遺于寮案共沐

甄埏用宣

惠于蒸黎潛消疵癘

對時育物敬仰

聖人長養之心食

德飲

和益宏

大造均調之化所有臣感激忭幸下忱理合繕摺

奏謝

天恩伏乞

皇上聖鑒謹

奏

道光五年五月二十九日具

奏七月初六日奉到

硃批知道了欽此

籌款飭繳兇器摺子

附片一件

奏爲籌款飭繳兇器以重民命而靖地方仰祈

聖鑒事竊照皖省鳳潁泗州等屬界連徐豫民情好
鬪動輒傷人其傷人之具鳥鎗而外多屬金刃
緣該境愚民久沿惡習往往藏置例禁刀鎗以
爲保衛身家之用迨藏之既久日與器習偶然
爭角順手取攜鬪無不傷傷無不死爲禍之烈
與鳥鎗等此而不設法以籌之非所以重民命
而靖地方也臣以爲嚴查飭禁或致滋擾不若
因勢利導使民易從恭查前奉

諭旨民間私藏鳥鎗積習相沿一旦搜拏治罪未免
有滋擾累著通諭各省出示曉諭准其呈繳給價
等因欽遵在案敬繹

訓示實爲良法美意

臣推廣

聖訓屢諭鳳潁泗三屬民人將刀鎗等項違禁器物
同鳥鎗一併繳官給價然非籌款發給價銀恐
小民顧惜薄值難期踴躍查蕪關有解交撫署
公用銀兩經前撫臣李鴻賓奏明每歲酌撥銀
四千兩解存藩庫以爲緝捕公費除連年因公
動用外截至本年五月底尙存銀六千四十五

兩零前項銀兩本由巡撫衙門劃出爲緝捕之用自可以公濟公臣業於前款內飭司撥銀二千兩解交廬鳳道戴聰酌量分給各屬爲呈繳各器械價值並飭各牧令廣爲勸諭務令小民咸知將烏鎗刀鎗等項兇器悉數繳官一俟繳到卽隨時發價俾知踴躍仍飭不得假手書役致滋擾累並將收繳件數按月一報期於盡淨而後已如此辦理庶收繳不託空言帶刀或能衰息於飭整民風似有裨益合將籌辦緣由恭摺奏

聞伏乞

皇上聖鑒謹

奏

道光五年六月初四日具

奏七月初十日在吳江舟次奉到

硃批知道了欽此

再臣自到任後審結京控奏咨各案共八十餘起尙有人證未齊數案現在奉

旨調任江蘇巡撫業已起程不及審辦該臬司劉斯崙前奉

諭旨調赴山東因委署乏員經臣奏請暫留蒙

恩允准臣現將未結各案飭交該司劉斯崙暨藩司徐承恩分別催提研審以期速結合併附片以聞伏乞

聖鑒謹

奏

奉

硃批知道了欽此

附奏裁汰里書摺片

再查里書名目久奉禁革今亳州相沿陋習仍未革除亦不知始自何年無從追溯推原其故緣里書多係世守凡地糧科則及推收順莊等冊均收藏在家不以示人其花戶散處各方戶名多屬堂名祖號本難稽考其買賣田宅又月異而歲不同非經手冊籍之人按戶勾稽隨時登注必致互異若遽行革除而各里書藏匿底冊他役卽無從稽查於應徵糧戶難免舛錯歷久因循實由於此臣現已飭司確查妥籌辦理

硃批

甚是

務將里書照例裁汰並期無誤催科以免把持而杜流弊合併附片以

聞伏乞

聖鑒謹

奏

道光五年六月初四日附

奏七月初十日奉到

硃批覽欽此

勸設豐備義倉摺子

奏爲敬陳勸設豐備義倉章程請

旨永遠遵行以防荒歉而厚民生仰祈

聖鑒事 臣惟民以食爲本事須豫則立前年皖江被

水哀鴻遍野仰蒙

恩旨賑撫兼施並經 臣勸諭有力之家捐輸助賑流

離數十萬獲就安全事後猶深憫惻因思博施

濟衆自古綦難徹土綢繆宜先陰雨常平之制

善矣然待惠者無窮至社倉春借秋還初意未

始不美而歷久弊生官民俱累變而通之惟有

於州縣中每鄉每村各設一倉秋收後聽民間
量力捐輸積存倉內遇歲歉則以本境所積之
穀卽散給本境之人一切出納聽民間自擇殷
實老成管理不經官吏之手以冀圖匱於豐簡
便易行自上年酌議章程通飭各屬出示勸行
已據青陽銅陵望江太平懷遠婺源等處捐有
成數各屬亦皆踴躍擬俟今年秋熟後一律辦
理臣於正月入

覲曾經縷達

天聽茲

臣

蒙

恩調任江蘇念此垂成之緒必須奏奉

諭旨庶可久遠遵行謹將所議章程十二條敬爲我
皇上陳之

一鄉村無論百餘家十數家總以里居聯絡者
公設一倉每年秋收後各量力之盈絀捐穀
存倉出者毋吝勸者毋勒或數十石或十數
石多則一二百石少卽數石數斗數升均無
不可收穀時公同立簿登記擇一老成殷實
人總管再擇一二人逐年遞管仍設立四柱
交冊分別舊管新收開除實在明晰登載互

相稽查連年豐稔日積日多則穀不可勝食矣

一鄉村零戶有難於聯絡者或每族各爲一倉或一族中每房各爲一倉或以散戶歸入附近鄰保共爲一倉均聽民便總在隨地制宜多多益善果能一處行之有效久而他處自仿照行之矣

一設倉宜擇善地不宜近水不宜近市以防不虞建議之初倉廩未立或神廟或公祠或老成殷實之家倉屋有餘者均可借儲但須本

人情願不得強借一俟穀石稍充即可另自置倉

一倉穀由於樂捐間或有濕有糝不能拘泥畫一應於收倉時先爲曬乾車淨公同登記耗蝕若干或收貯年久又須公同出曬一次覆量上倉再逐一登記實數以便查考

一設倉本係義舉司事之人不容稍有侵蝕亦不許藉端開銷惟看守倉廩之人係屬僱覓常川在倉不能不給予工食責令巡查遇有風摧雨漏倉板損破之處立即告知經管之

人及時修理其鎖鑰等項不得交守倉人佩帶

一捐穀既有成數卽赴地方官呈明立案以免匪徒阻撓擾亂章程以後捐多捐少收放出官吏概不與聞卽里長甲長亦無許越俎倘有吏役託名稽查藉端需索查出照詐贓例從重懲治

一積穀旣饒止須添建倉廩不必推陳出新以求滋長亦不必春借秋還以權利息戢爭杜紛此爲最要惟餘穀置田收租尙可並行不

惇然必積穀實在充裕有餘以少半置田乃
可否則不必蓋此穀原爲備荒而設至捷至
便推陳出入易滋朦混借出難歸漸歸烏有
置買產業雖屬經久之計然不能救濟目前
亦非急務也

一每遇災荒總管分管外添擇公正司事計穀
之多寡先儘本村中鰥寡孤獨無告之人次
及極貧又次及次貧或五日一散或十日一
散事竣憑衆確算至家計稍可支持者不必
分給卽小歉之年亦不必動用以歸實濟

一捐穀之家此穀既捐卽係公物遇有災歉不得以從前甲多乙少致啟爭端或先在此村捐穀之家其後移居他處遇此村散放不得以曾經捐穀回向轉索新來之戶從前雖未捐穀遇有散放亦應酌給些須不得獨任向隅蓋各保各境以鄉村爲斷雖救卹無分彼此而穀少人多亦不得不稍爲限制其各族各房積穀者則不必以鄉村爲斷

一年豐時和勸捐較易果能積有三年五年之蓄又不妨略爲變通邀同衿耆劃分若干於

鄉間添設卹發育嬰等會或於冬間就村莊中鰥寡孤獨與外來無告窮民量爲賑濟亦所以廣任卹也

一鄉村紳士克知大義者多自必首捐爲倡如有能捐穀千石者或捐銀千兩以上買穀歸倉者或捐置基產倉廩及斗斛諸器物用銀千兩以上者均當照例請

旌以資鼓勵倘慮書吏索費卽逕赴院司衙門呈明捐數以便行查確實立予請

旌斷不令善舉稍有阻格

一勸捐之外尙有因事樂施一節如民間演戲酬神及嫁娶喜期慶祝生日儘可將糜費折穀捐入義倉擴而充之不特安貧卽以保富將型仁講讓之風亦由此而興起矣

以上各條積少成多衆擎易舉所以圖便民也各保各境人心易齊耳目亦周所以免牽掣也擇人經管立冊交代所以防侵蝕也紳民自理不經官員吏役之手所以杜騷擾也不減糶不出易不借貸專意存貯以備歉時所以斷糾葛而弭爭端也凶年不妨盡用樂歲

仍可捐輸以一鄉濟一鄉之衆而不患其不均以數歲救一歲之荒而不虞其不給可小可大無窮匱也取錙銖於狼戾之時求水火於至足之地捐穀者不以爲難司事者不以爲累行所無事不求其利而弊自除預防其弊而利乃久也臣爲此章程籌思經歲簡便直捷似可爲備荒之一助如果各州縣能實心實力勸導有成是亦不費之惠也再臣所議章程與社倉之法有異本以豐歲之有餘備荒年之不足可否卽以豐備二字仰懇

天恩

賜爲倉名俾垂永久所有勸設義倉緣由謹繕摺具
奏伏乞

皇上聖鑒

訓示遵行謹

奏

夾片一件

再勸捐義穀各保各境原係使民自養之意惟
小民難與圖始必須地方官善爲勸導始能有
成臣於上年發劄通飭之後卽據青陽縣稟稱

邀集紳耆勸捐穀石有東鄉之賀倪等姓二十
六祠東南鄉之孫徐等姓三十六祠南鄉之王
吳等姓十七祠西鄉之陳羅吳等姓三祠情願
將祠田餘租捐出備荒自一二十石至四五十
石不等共計收穀二千餘石始基已立無難逐
漸增添等語又據銅陵縣稟稱勸諭紳耆布發
章程卽有廩生周充之母周陳氏捐銀易穀一
千二百石併將祠旁餘屋基址改建倉廩又職
員仇殿選貢生胡有容等呈報捐穀三四百石
不等已陸續收貯公倉其餘按畝捐穀者尙多

又據望江縣稟稱勸導各鄉有舉人周錫元貢生龍士琦等捐穀六百餘石並捐錢置倉現在各鄉鼓舞陸續捐輸又據太平縣稟報附貢生杜寅捐銀千兩買穀建倉爲伊本支房下濟荒之用其餘捐者尙多又據懷遠縣稟稱集衆勸捐有紳耆宋汝金孫汝琪馬恒利宋士傑等十餘人倡捐秬穀千數百石以後儘可續捐等語餘如旌德縣姚繩武之故祖姚鳳岐捐銀千兩獨設義倉婺源縣職員俞鎮璋等閭族共捐銀一萬餘兩置買義田三百餘畝先有成議因

臣

勸設義倉呈明備案請獎此外懷寧黟縣等二
十一州縣亦稱陸續遵辦可冀有成除樂捐各
姓名容再查明銀數照例題咨請

旌外所有勸捐義倉最爲得力之青陽縣知縣李曉
林銅陵縣知縣孫榮望江縣知縣尹作翰太平
縣知縣續瑞懷遠縣知縣周天爵可否仰懇
天恩將該五員交部議敘以爲畱心民瘼者勸臣爲
地方起見謹附片具陳伏乞

聖鑒謹

奏

道光五年六月初四日在安慶拜發七月初十日江蘇吳江舟次奉到

硃批另有旨欽此又夾片一件亦奉

硃批另有旨欽此同日奉到道光五年六月二十三日內閣奉

上諭陶澍奏勸設義倉章程一摺國家養民之道足食爲先而裕民之原積貯尤重前年安徽偶遇荒歉賑撫兼施該撫請設立義倉爲未雨綢繆之計所議章程如州縣中每鄉村公設一倉秋後聽民捐輸歲歉酌量散給出納悉由民間經手不假官

吏防侵蝕以禁騷擾矜貧寡而杜爭端各條著卽
移交新任巡撫照議妥爲經理仍督飭各州縣實
心實力勸導有成總期經久無弊不必另立倉名
至另片奏青陽等縣紳耆克知大義捐輸穀石查
明請旌等語著俟捐有成數查開姓名銀數照例
題咨量予旌獎以示鼓勵其勸捐出力之青陽縣
知縣李曉林銅陵縣知縣孫榮望江縣知縣尹作
翰太平縣知縣續瑞懷遠縣知縣周天爵俱著加
恩交部議敘該部知道欽此